



ADAB & LARANGAN KETIKA MENZIARAH KUBUR



Terbitan:

JABATAN MUFTI NEGERI SARAWAK
ARAS 15, MAJMA' TUANKU ABDUL HALIM MU'ADZAM SHAH
LORONG P.RAMLEE 5, OFF JALAN P.RAMLEE
93400 KUCHING, SARAWAK.
Pejabat Am: 082-507500
Fax: 082-507200/507300
Laman web rasmi: <http://www.muftinegeri.sarawak.gov.my>

ADAB BERKAITAN KUBUR

Pendahuluan

Menziarahi kubur adalah amalan mulia yang patut dikekalkan dari generasi ke generasi. Antara kelebihan amalan menziarahi kubur adalah:-

1. Dikasihi Allah SWT atas sebab mengikuti sunnah Rasulullah SAW.
2. Untuk mengingati kita tentang asal usul kejadian kita.
3. Menginsafi diri tentang kematian, alam kubur dan hari kiamat.
4. Mengambil iktibar tentang apa yang telah berlaku, dapat melembutkan kekerasan hati dan dapat mendidik jiwa.
5. Berlaku ihsan kepada orang yang telah meninggalkan kita.

Daripada Abu Hurairah r.a berkata, bahawa Rasulullah SAW bersabda yang bermaksud: *"Perbanyakanlah mengingati pemutus kenikmatan dunia (mati)."* (Hadis Hasan riwayat al-Tirmizi)

HUKUM ZIARAH KUBUR

Para ulama sepakat berpendapat bahawa sunat bagi lelaki menziarahi kubur. Ini berdasarkan hadith Rasulullah SAW yang bermaksud:

Pada suatu ketika Rasulullah SAW menziarahi kubur ibu baginda, lalu baginda menangis, maka menangis juga orang di sekelilingnya. Kemudian baginda bersabda:

"Aku memohon kepada Tuhanku untuk aku memintakan ampun bagi ibuku, tetapi permohonanku tidak diperkenankan-Nya. Kemudian aku memohon keizinan untuk menziarahi kuburnya, maka diperkenankan-Nya bagiku, maka pergilah kamu menziarahi kubur, kerana itu akan mengingatkan kamu kepada kematian." (Hadis Sahih riwayat al-Jama'ah)

Menurut pendapat Jumhur Ulama', hukum menziarahi kubur bagi perempuan adalah makruh kerana sifat mereka yang kurang sabar, cepat tersentuh perasaan atau sensitif dan dibimbangi akan menimbulkan perasaan dukacita yang bersangatan.

Sungguhpun demikian, terdapat dalil yang menunjukkan bahawa hukum bagi kaum perempuan menziarahi kubur adalah harus, iaitu sebuah hadis yang diriwayatkan oleh Anas bin Malik r.a yang mana Rasulullah SAW berjalan melintasi seorang perempuan yang sedang menangis di kubur anaknya, lalu Baginda SAW bersabda yang bermaksud: *"Bertaqwalah kamu kepada Allah dan bersabarlah."* (Hadis Muttafaq 'Alaih)

Dapat kita fahami daripada hadis tersebut bahawa menziarahi kubur bagi seseorang perempuan itu tidak dilarang, kerana jika perbuatan tersebut dihukumkan haram atau dilarang bagi kaum perempuan, sudah tentu Rasulullah SAW akan menjelaskan tentang larangan tersebut.

Satu lagi dalil ialah hadis Aisyah r.a yang juga pernah menziarahi kubur, dia bertanya kepada Rasulullah SAW, "Apakah yang patut aku baca kepada orang yang sudah meninggal dunia ketika itu aku melawat perkuburan? Maka jawab Rasulullah SAW: *"Katakanlah. Mudah-mudahan Allah limpahkan keselamatan ke atas ahli kubur daripada kalangan orang mukmin dan muslim dan semoga Allah merahmati orang terdahulu dari kalangan kami dan orang yang terkemudian dan sesungguhnya sekiranya kami diizinkan oleh Allah kami akan bertemu dengan kamu."* (Hadis Sahih riwayat Muslim). Secara ringkasnya dapatlah dirumuskan bahawa hukum menziarahi kubur bagi kaum perempuan adalah bergantung kepada tujuannya.

Jika tujuannya hanya untuk mengambil iktibar dan untuk mengingati kematian di samping dia dapat menjaga adab adabnya, maka hukumnya adalah harus dan jika tujuan sebaliknya dan tidak dapat menjaga adab-adabnya, hukumnya boleh menjadi haram.



ADAB & LARANGAN MENZIARAH KUBUR

1. Dalam keadaan berwuduk.
2. Berpakaian sopan dan menutup aurat.
3. Memberi salam kepada ahli atau penghuni kubur, afdal dilakukan dalam keadaan berdiri di tepi perkuburan dengan membelakangi kiblat dan menghadap ke arah muka ahli kubur yang dizarahi. Hal ini juga diamalkan ketika membaca talkin. (Disunatkan memberi salam dan berdoa walaupun sekadar melintasi mana-mana kubur orang Islam sekalipun tanpa niat ziarah secara khusus). Doanya ialah:

السَّلَامُ عَلَيْكُمْ أَهْلَ الدِّيَارِ مِنَ الْمُؤْمِنِينَ وَالْمُسْلِمِينَ
وَإِنَّا إِن شَاءَ اللَّهُ لَآحِقُونَ نَسْأَلُ اللَّهَ لَنَا وَلَكُمْ الْعَافِيَةَ

Maksudnya: *"Semoga kesejahteraan untukmu, wahai penduduk Barzakh dari kalangan orang Mukmin dan Muslim. Sesungguhnya kami Insya-Allah akan menyusul, kami mohon kepada Allah untuk kami dan kamu, agar diberi keselamatan (dari apa yang tidak diinginkan)."* (Hadis Sahih riwayat Muslim)

4. Disunatkan kita berpaling ke arah kiblat dan mengangkat kedua-dua tangan untuk berdoa.
5. Bagi perempuan yang hendak menziarahi kubur sebaik-baiknya hendaklah ditemani oleh suami ataupun mahramnya serta menjaga diri dari tabarruj (berhias dan menzahirkan kecantikan).
6. Berakhlak dengan akhlak mulia.
7. Menjaga kebersihan kawasan perkuburan dan persekitarannya.
8. Dilarang meratap, meraung, memukul-mukul pipi, merontar-ronta kerana terlalu sedih. Rasulullah SAW bersabda yang bermaksud: *"Bukanlah dari golongan kami orang yang menampar-nampar pipi, merobek leher baju, dan berseru dengan seruan jahiliah."* (Hadis Muttafaq 'Alaih)
9. Makruh duduk dan merangkak di atas kubur, melangkah kubur dan bersandar pada kubur. Rasulullah SAW bersabda yang bermaksud:

"Sekiranya seseorang kamu duduk di atas bara api yang membakar pakaiannya dan menyentuh serta menghanguskan kulitnya adalah lebih baik baginya daripada duduk di atas kubur." (Hadis Sahih riwayat Muslim)

10. Tidak harus memijak kubur kecuali jika ada keperluan seperti tiada jalan menuju ke kubur dan menggali kubur yang tiada tempat untuk berpijak, kerana memijak-mijak itu sama seperti hukum duduk di atas kuburan.

11. Haram melakukan perkara-perkara khurafat yang menjejaskan akidah seperti mencium atau mengusap usap batu nisan, kubur, tanah perkuburan dan seumpamanya.
12. Dilarang berniat dan mengambil keberkatan daripada kubur.
13. Dilarang mengikut atau menyerupai adat atau perbuatan agama lain seperti membawa kalungan atau jambangan bunga. Rasulullah SAW bersabda yang bermaksud: *"Sesiapa yang menyerupai sesuatu kaum, maka dia tergolong dalam kelompok mereka."* (Hadis Sahih riwayat Abu Dawud)

PENGGALIAN SEMULA/ PEMINDAHAN KUBUR ORANG ISLAM

Kubur orang Islam boleh digali semula dan / atau dipindahkan atas alasan berikut jika mayat dikuburkan:

Wajib Gali Semula / Pindah

1. Di tanah perkuburan orang bukan Islam.
2. Belum dimandikan.
3. Tidak menghadap kiblat.
4. Dikapan dengan kain yang dirampas.
5. Ada bersama mayat itu harta orang lain yang dituntut oleh empunya.
6. Sebab-sebab lain yang diluluskan oleh Mufti Negeri Sarawak.

Harus Gali Semula / Pindah

1. Di tanah kepunyaan orang lain tanpa izin sekiranya dituntut.
2. Di tanah yang dikhuatiri susur atau hakis seperti tebing sungai atau di lereng bukit.
3. Di tanah yang akan dimajukan oleh pihak berkuasa untuk maslahat umum seperti membuat jalan raya.
4. Di tanah lumpur yang ditenggelami air.
5. Bersama mayat lain yang menyebabkan hati warisnya tidak senang.
6. Sebab-sebab lain yang diluluskan oleh Mufti Negeri Sarawak.

PERHATIAN:

Penggalian semula dan pemindahan mayat di tanah perkuburan hanya akan dibenarkan setelah permohonan diproses oleh Jabatan Agama Islam Sarawak.



PANDUAN BINAAN NAPOR & TANDA ARAH KIBLAT DI KUBUR



Terbitan:

JABATAN MUFTI NEGERI SARAWAK
ARAS 15, MAJMA' TUANKU ABDUL HALIM MU'ADZAM SHAH
LORONG P.RAMLEE 5, OFF JALAN P.RAMLEE
93400 KUCHING, SARAWAK.
Pejabat Am: 082-507500
Fax: 082-507200/507300
Laman web rasmi: <http://www.muftinegeri.sarawak.gov.my>

PANDUAN MEMBUAT BINAAN (NAPOR/BAKUT) PADA KUBUR

Pendahuluan

Tanggungjawab bagi orang islam yang hidup ke atas jenazah orang islam ialah:

1. Memandikan jenazah;
2. Mengkafankan jenazah;
3. Menyembahyangkan jenazah dan
4. Mengebumikan jenazah.

Setelah jenazah tersebut dikebumikan, adalah menjadi kebiasaan masyarakat Islam di Negeri Sarawak khususnya membuat binaan di atas kubur yang terdiri daripada nisan dan binaan (napor/bakut).

Dalam hal ini Islam telah menentukan garis panduan mengenai perkara berkenaan sebagaimana hadis Rasulullah SAW yang berikut:


“Rasulullah SAW menegah dari melapisi kubur dengan kapur putih, dari duduk di atasnya dan dari membuat binaan di atasnya.”
(Hadis riwayat Muslim dari Jabir r.a.)

“Dari Sufyan al-Tammar, Ia melihat kubur Rasulullah SAW tingginya hanya sekadar tinggi bonggol unta sahaja.”
(Hadis riwayat Bukhari)

“Bahawa Rasulullah SAW dibuat untuknya liang lahad, ditekakkannya dengan batu bata, ditinggikan kubur dari bumi sebanyak sejengkal.” (Hadis riwayat Ibn Hibban)

Riwayat tersebut diperkuatkan oleh seorang saksi Saleh bin Abi Saleh berkata:
“Aku melihat kubur Rasulullah SAW tinggi sejengkal dari permukaan bumi.”
(Hadis riwayat Abu Daud)

PANDUAN BINAAN TANDA ARAH KIBLAT MENGIKUT MODEL SARANAN PEJABAT MUFTI NEGERI SARAWAK




TANDA ARAH KIBLAT

Binaan Tanda Arah Kiblat ini hendaklah dibina di kawasan tanah perkuburan bagi membimbing masyarakat Islam supaya urusan berkaitan ziarahi kubur, arah kiblat jenazah dan hukum binaan di tanah kubur mengikut hukum syarak.

Pada binaan Tanda Arah Kiblat ini dilengkapi dengan beberapa panduan dan adab berkaitan kubur, antaranya ialah:


1. Adab menziarahi kubur
2. Hukum menggali semula kubur
3. Panduan membuat binaan di kubur
4. Arah kiblat yang tepat




PANDUAN BINAAN (SAIZ NAPOR/BAKUT)

Binaan (napor/bakut) pada kubur adalah seperti berikut:

Ukuran dan saiz bagi kubur orang dewasa:
Panjang x Lebar x Tinggi = 44" x 24" x 8"



Ukuran dan saiz bagi kubur kanak-kanak:
Panjang x Lebar x Tinggi = 24" x 16" x 6"



LARANGAN DAN TEGAHAN

1. Tidak dibenarkan untuk meninggikan binaan (napor/bakut) melebihi ukuran dan saiz yang telah ditetapkan.
2. Tidak dibenarkan menutup atas binaan tersebut (napor/bakut) dengan apa-apa bahan seperti simen, kayu, dan sebagainya.
3. Tidak dibenarkan membina apa sahaja bahan binaan lain seperti bangku, pagar, bumbung dan lain-lain di atas kubur dan sekitar kawasan kubur.
4. Tidak dibenarkan membuat sesuatu pada binaan yang menyerupai agama lain dan bertentangan dengan hukum syarak seperti warna, bentuk binaan dan lain lain.



Perkuburan Baqi', Madinah